

# Ngā Tohu Pāpāho Māori 2008

nā Doug Hauraki, nō Ngāti Porou

I te pō tuku tohu ki ngā kaipāpāho Māori, kotahi anake te taonga mō te wahine, tāne rānei, ka whakaarohia nāna te 'takoha nui' mō te tau. He tohu tēnei mō ngā kaimahi reo irirangi Māori, whakaata irirangi me ngā kaituhi hoki. Ko te tino ngako o te takoha nei, ko te whakarangatira i tō tātau reo Māori.

Ka riro mā te komiti whāiti o Te Whakaruruhau o ngā Reo Irirangi Māori e tohu ko wai ka toa. Mā reira te koroua nei ka ohore, nō te mea he pōhēhē kē nōna i haere noa iho mai ki te tautoko i te kaupapa o te pō.

I tēnei tau ko te kaiwhiwhi ko Te Rere o Kapuni Makene nō Te Reo Irirangi o Te Hiku o te Ika me ōna tūhonotanga atu ki a Ngā Puhī me Te Rarawa.




Anei rāua ko te Hōnore Parekura Horomia, Minita mō ngā Take Māori. Kei tōna taha, ko tana whanaunga a Henare Kīngi, he kaipāpāho hoki nō Te Reo Irirangi o Te Upoko o te Ika.

## He pukapuka taketake hou

He mea kohikohi ēnei kōrero nā Te Taura Whiri i te Reo Māori

Ko te ingoa o te pukapuka hou a Rāpata Wiri ko 'Te Reo Taketake - Ko te Pū.' I tīmatahia te tuhi o tēnei pukapuka i te tau 2002 i a Rāpata e whakaako ana i te reo Māori i Te Whare Wānanga o Hawai'i i Mānoa. Nō te marama o Maehe kua taha nei, i whakarewahia ai te pukapuka nei i Te Whare Wānanga o Waikato. Nā Raupō i tā, i perēhi. Nā Haki Tuaupiki o Ngāti Mahuta te karakia waerea hei whakamāunu i te pukapuka, ā, nā Te Kāhautu Maxwell rāua ko Tame Roa ngā mihi whakatau i te ope i tae mai. I tae anō mai ngā kaiako reo Māori o te rohe o Tainui, ngā ākonga me ngā kaiako reo Māori o Waikato me ētahi atu o Te Whare Wānanga o Tāmaki Makaurau me ngā rohe o Waiariki me Mātaatua.

Ko te take i tuhia ai tēnei pukapuka, he whakarahi ake i ngā rauemi hei ako mai i tō tātau reo tuauriuri, whāioio ki te hunga e āhua tauhou ana ki te reo. Atu i a Tīmoti Kāretu rāua ko Hoani Waititi, tokoiti noa nei ngā kaituhi Māori kua whakaputa pukapuka whakaako reo Māori i ngā tau toru tekau kua hipa atu nei. Kua riro mā te Pākehā hei whakaako i ā tātau tamariki ki te kōrero Māori. Koinei te tuatahi o tētahi kāhui pukapuka takiwhā ka tuhia e Wiri i roto i ngā tau e rua e whai ake nei hei whakatairanga, hei ako mai i te hunga e kaingākau ana ki te reo. Hei tāpiri atu ki te pukapuka nei ko tētahi hōtaka ipurangi whakaako ā-waha, ā-kanohi, ā-taringa hoki, i ngā kaupapa o roto o te pukapuka nei. He rawe hoki te hōtaka ipurangi hei rauemi whakangahau mā ngā ākonga i roto i ngā kura me ngā whare wānanga hoki. E taea ai te kaikanohi atu ki tēnei hōtaka, tirohia mai te paetukutuku ipurangi nei: <http://www.maori.ac.nz>



TE REO TAKETAKE  
KO TE PŪ

A MĀORI LANGUAGE  
COURSE FOR BEGINNERS

Rāpata Wiri